

# 《華嚴經普賢行願品》講表

## 《華嚴經普賢行願品》

唐・三藏般若大師譯

唐・沙門澄觀大師科

○將述此經，大分為四：

壹、解釋經題

貳、修學綱要

參、隨文釋義

肆、結示勸修

今初

## 壹、解釋經題

◆本品出自《華嚴經》，具稱《大方廣佛華嚴經入不思議解脫境界普賢行願品》

■五重玄義（分五：甲一、釋名。甲二、顯體。甲三、明宗。甲四、論用。甲五、判教。）

甲一、釋名（分三：乙一、釋別名。乙二、釋通名。乙三、釋品目。）

乙一、釋別名：（以下糅合慈舟大師《普賢行願品親聞記》）

丙一、釋「大方廣」：直指吾人現前生佛同體之心性（體、相、用）。

○「大」——體也，十法界共有之心體。法界雖有十，其體唯一。

○「方」——相也，具足妙有之福德相、智慧相。

○「廣」——用也，能生一切世間、出世間善因果。

丙二、釋「佛華嚴」

○「佛」——果也，梵語「佛陀耶」，此翻覺者，謂自覺、覺他、覺行圓滿。

○「華」——因也，以從喻得名，通人通法。約人，即普賢菩薩。約法，即普賢十大行願。

○「嚴」——總相也，此嚴字，是因果總相。因修萬行為能嚴，果彰眾德為所嚴，能嚴所嚴皆云嚴也。

乙二、釋通名：「經」——有貫穿、攝化之意。

○「經」——梵語 sūtra，音譯為「修多羅」，義譯為「線」，此云「契經」。即是上

契佛理以度眾生，下契生機令證佛理。亦可釋為「常」或「法」。

乙三、釋品目：「入不思議解脫境界普賢行願品」（糅合諦閑大師《普賢行願品輯要疏》）

○「入不思議解脫境界」——「入」者，證入也，有能所。「普賢行願」為能入，「不思議解脫境界」為所入。「不思議」：心言罔及故。「解脫境界」即佛菩薩境界。

○「普賢行願品」——「品」者，類也。言普賢行願者，體性周遍曰普，隨緣成德稱賢。行與願，如鳥二翼，車二輪；必須二翼完全，始可翔空；二輪具足，才能致遠。

※此品為全部華嚴關鍵，修行樞機。文約義豐，可軌可持。不能受持全部華嚴者，當以受

持此品為日課。（糅合慈舟大師《普賢行願品親聞記》）

甲二、顯體：此《普賢行願品》以一真法界為體。

甲三、明宗：以十大願王導歸極樂為宗。一一行願，無非稱性之修德也。

甲四、論用：以拔眾生苦，與諸佛樂為德用。

甲五、判教：以圓頓大乘，第一乳味為教相。（糅合諦閑大師《普賢行願品輯要疏》）

## 貳、修學綱要

○修學普賢十大願王：（糅合懺雲老和尚《十大願王旨要開示》）

一者禮敬諸佛——身業清淨。敬：意業清淨。

二者稱讚如來——語業清淨。修以上二願，則三業清淨。念佛、弘法即是稱讚如來。

三者廣修供養——諸供養中，法供養最。

四者懺悔業障——若此惡業，有體相者，盡虛空界，不能容受。誠心懺悔，後不復造，恒住淨戒一切功德。

五者隨喜功德——一、眾擎易舉。二、則不嫉妬。三、隨喜功德則不隨罪過。

六者請轉法輪——請自性佛，常轉法輪；輾平心地，運載彼岸。以聞思修，常轉法輪。

七者請佛住世——請自性佛，常住在世，佛在心頭坐。常常念佛，即請佛住世。

八者常隨佛學——學佛三業，學佛六度，學佛慈悲，學佛度眾，難忍能忍，難行能行。

九者恒順眾生——一、孝順父母，二、教育子女，三、夫婦相敬如賓，

四、兄友弟恭如手如足。

十者普皆迴向——一、迴向眾生，二、迴向菩提，三、以修德顯性德，大學之道，在明明德，為迴向實際，即迴事向理。

參、隨文釋義

○入文分三：甲一、序分。甲二、正宗分。甲三、流通分。今初

甲一、序分（分二：乙一、結前廣偈。乙二、結說不盡。）

乙一、結前廣偈

爾時，普賢菩薩摩訶薩，稱歎如來勝功德已。

乙二、結說不盡

告諸菩薩及善財言：善男子！如來功德，假使十方一切諸佛，經不可說不可說佛剎極微塵數劫，相續演說，不可窮盡。

甲二、正宗分（分二：乙一、正陳所說。乙二、結說讚善。）

乙一、正陳所說（分二：丙一、長行。丙二、偈頌。）

丙一、長行（分三：丁一、正示普因。丁二、顯經勝德。丁三、結勸受持。）

丁一、正示普因（分四：戊一、標示所應。戊二、徵列名數。戊三、牒名別釋。

戊四、結益令知。）

戊一、標示所應

若欲成就此功德門，應修十種廣大行願。

戊二、徵列名數

何等為十？一者、禮敬諸佛。二者、稱讚如來。三者、廣修供養。四者、懺悔業障。五者、隨喜功德。六者、請轉法輪。七者、請佛住世。八者、常隨佛學。九者、恆順眾生。十者、普皆迴向。

戊三、牒名別釋（分二：己一、總徵。己二、別釋。）

己一、總徵

善財白言：「大聖！云何禮敬乃至迴向？」

己二、別釋（分十：庚一、禮敬諸佛。庚二、稱讚如來。庚三、廣修供養。

庚四、懺悔業障。庚五、隨喜功德。庚六、請轉法輪。

庚七、請佛住世。庚八、常隨佛學。庚九、恆順眾生。

庚十、普皆迴向。）

庚一、禮敬諸佛（分三：辛一、牒名。辛二、釋相。辛三、總結。）

辛一、牒名

**普賢菩薩告善財言：善男子！言禮敬諸佛者。**

辛二、釋相（分三：壬一、所禮境。壬二、能禮因。壬三、能禮相。）

壬一、所禮境

**所有盡法界、虛空界，十方三世一切佛剎，極微塵數諸佛世尊，**

壬二、能禮因

**我以普賢行願力故，深信解，如對目前，**



壬三、能禮相（分二：癸一、總明。癸二、別顯。）

癸一、總明

悉以清淨身語意業，常修禮敬。

癸二、別顯

一一佛所，皆現不可說不可說佛剎極微塵數身。一一身，遍禮不可說不可說佛剎極微塵數佛。

辛三、總結（分二：壬一、顯無盡。壬二、彰無間。）

壬一、顯無盡（分二：癸一、別明虛空。癸二、總例餘三。）

癸一、別明虛空

虛空界盡，我禮乃盡，以虛空界不可盡故，我此禮敬無有窮盡。

癸二、總例餘三

如是乃至眾生界盡，眾生業盡，眾生煩惱盡，我禮乃盡。而眾生界乃至煩惱無有盡故，我此

禮敬無有窮盡。

壬二、彰無間

念念相續，無有間斷；身語意業，無有疲厭。

庚二、稱讚如來（分三：辛一、牒名。辛二、釋相。辛三、總結。）

辛一、牒名

復次，善男子！言稱讚如來者。

辛二、釋相（分三：壬一、所讚境。壬二、能讚因。壬三、能讚相。）

壬一、所讚境

所有盡法界、虛空界，十方三世一切剎土，所有極微一一塵中，皆有一切世間極微塵數佛；一一佛所，皆有菩薩海會圍繞。

壬二、能讚因

我當悉以甚深勝解，現前知見，

壬三、能讚相

各以出過辯才天女微妙舌根，一一舌根，出無盡音聲海；一一音聲，出一切言辭海，稱揚讚歎一切如來諸功德海。窮未來際，相續不斷；盡於法界，無不周徧。

辛三、總結

如是虛空界盡，眾生界盡，眾生業盡，眾生煩惱盡，我讚乃盡。而虛空界乃至煩惱，無有盡故，我此讚歎無有窮盡。念念相續，無有間斷；身語意業，無有疲厭。

庚三、廣修供養（分三：辛一、牒名。辛二、釋相。辛三、總結。）

辛一、牒名

復次，善男子！言廣修供養者。

辛二、釋相（分二：壬一、正明供行。壬二、校量顯勝。）

壬一、正明供行（分四：癸一、明所供境。癸二、明能供因。癸三、列所供具。

癸四、正明供養。）

癸一、明所供境

所有盡法界、虛空界，十方三世一切佛剎，極微塵中，一一各有一切世界極微塵數佛，一一佛所，種種菩薩海會圍繞。

癸二、明能供因

我以普賢行願力故，起深信解，現前知見，

癸三、列所供具

悉以上妙諸供養具，而為供養。所謂華雲、鬘雲、天音樂雲、天傘蓋雲、天衣服雲，天種種香：塗香、燒香、末香，如是等雲，一一量如須彌山王。然種種燈：酥燈、油燈、諸香油燈，一一燈柱，如須彌山；一一燈油，如大海水。

癸四、正明供養

以如是等諸供養具，常為供養。

壬二、校量顯勝（分二：癸一、校量。癸二、徵釋。）

癸一、校量（分二：子一、舉所校量。子二、正明校量。）

子一、舉所校量（分二：丑一、總指。丑二、別明。）

丑一、總指

善男子！諸供養中，法供養最。

丑二、別明

所謂如說修行供養，利益眾生供養，攝受眾生供養，代眾生苦供養，勤修善根供養，不捨菩薩業供養，不離菩提心供養。

子二、正明校量

善男子！如前供養無量功德，比法供養一念功德，百分不及一，千分不及一，百千俱胝那由他分、迦羅分、算分、數分、喻分、優波尼沙陀分，亦不及一。

癸二、徵釋

何以故？以諸如來尊重法故。以如說行，出生諸佛故。若諸菩薩行法供養，則得成就供養如來。如是修行，是真供養故。

辛三、總結

此廣大最勝供養，虛空界盡，眾生界盡，眾生業盡，眾生煩惱盡，我供乃盡，而虛空界乃至煩惱不可盡故，我此供養亦無有盡。念念相續，無有間斷；身語意業，無有疲厭。

庚四、懺悔業障（分三：辛一、牒名。辛二、釋相。辛三、總結。）

辛一、牒名

復次，善男子！言懺悔業障者。

辛二、釋相（壬一、舉所懺。壬二、辯懺相。）

壬一、舉所懺（分二：癸一、正舉。癸二、顯多。）

癸一、正舉

菩薩自念：我於過去無始劫中，由貪瞋癡，發身口意，作諸惡業，無量無邊。

癸二、顯多

若此惡業，有體相者，盡虛空界，不能容受。

壬二、辯懺相（癸一、正釋其相。癸二、明所對境。）

癸一、正釋其相

我今悉以清淨三業，

癸二、明所對境

遍於法界，極微塵剎，一切諸佛菩薩眾前，誠心懺悔，後不復造，恆住淨戒一切功德。

### 辛三、總結

如是虛空界盡，眾生界盡，眾生業盡，眾生煩惱盡，我懺乃盡，而虛空界乃至眾生煩惱不可盡故，我此懺悔無有窮盡。念念相續，無有間斷；身語意業，無有疲厭。

庚五、隨喜功德（分三：辛一、牒名。辛二、釋相。辛三、總結。）

### 辛一、牒名

復次，善男子！言隨喜功德者。

辛二、釋相（分四：壬一、喜如來善。壬二、喜諸趣善。壬三、喜二乘善。

壬四、喜菩薩善。）

### 壬一、喜如來善

所有盡法界、虛空界，十方三世一切佛剎，極微塵數諸佛如來，從初發心，為一切智，勤修福聚，不惜身命，經不可說不可說佛剎極微塵數劫，一一劫中，捨不可說不可說佛剎極微塵



數頭目手足。如是一切難行苦行，圓滿種種波羅蜜門，證入種種菩薩智地，成就諸佛無上菩提及般涅槃，分布舍利，所有善根，我皆隨喜。

壬二、喜諸趣善

及彼十方一切世界，六趣四生，一切種類，所有功德，乃至一塵，我皆隨喜。

壬三、喜二乘善

十方三世一切聲聞及辟支佛，有學無學，所有功德，我皆隨喜。

壬四、喜菩薩善

一切菩薩所修無量難行苦行，志求無上正等菩提，廣大功德，我皆隨喜。

辛三、總結

如是虛空界盡，眾生界盡，眾生業盡，眾生煩惱盡，我此隨喜，無有窮盡。念念相續，無有間斷；身語意業，無有疲厭。

庚六、請轉法輪（分三：辛一、牒名。辛二、釋相。辛三、總結。）

辛一、牒名

復次，善男子！言請轉法輪者。

辛二、釋相（分二：壬一、舉所請境。壬二、正明請法。）

壬一、舉所請境

所有盡法界、虛空界，十方三世一切佛剎，極微塵中，一一各有不可說不可說佛剎，極微塵數廣大佛剎；一一剎中，念念有不可說不可說佛剎，極微塵數一切諸佛成等正覺，一切菩薩海會圍繞。

壬二、正明請法

而我悉以身口意業，種種方便，殷勤勸請，轉妙法輪。

辛三、總結

如是虛空界盡，眾生界盡，眾生業盡，眾生煩惱盡，我常勸請一切諸佛，轉正法輪，無有窮盡。念念相續，無有間斷；身語意業，無有疲厭。

庚七、請佛住世（分三：辛一、牒名。辛二、釋相。辛三、總結。）

辛一、牒名

復次，善男子！言請佛住世者。

辛二、釋相

所有盡法界、虛空界，十方三世一切佛剎，極微塵數諸佛如來，將欲示現般涅槃者，及諸菩薩、聲聞、緣覺，有學無學，乃至一切諸善知識，我悉勸請莫入涅槃。經於一切佛剎極微塵數劫，為欲利樂一切眾生。

辛三、總結

如是虛空界盡，眾生界盡，眾生業盡，眾生煩惱盡，我此勸請，無有窮盡。念念相續，無有

間斷；身語意業，無有疲厭。

庚八、常隨佛學（分三：辛一、牒名。辛二、釋相。辛三、總結。）

辛一、牒名

復次，善男子！言常隨佛學者。

辛二、釋相（分二：壬一、學本師。壬二、例一切。）

壬一、學本師（分二：癸一、明所學。癸二、辨能學。）

癸一、明所學（分二：子一、明因行。子二、辨果用。）

子一、明因行

如此娑婆世界毗盧遮那如來，從初發心，精進不退，以不可說不可說身命而為布施；剝皮為紙，析骨為筆，刺血為墨，書寫經典，積如須彌。為重法故，不惜身命，何況王位、城邑、聚落、宮殿、園林，一切所有，及餘種種難行苦行。

## 子二、辨果用

乃至樹下成大菩提，示種種神通，起種種變化，現種種佛身，處種種眾會，或處一切諸大菩薩眾會道場，或處聲聞，及辟支佛眾會道場，或處轉輪聖王，小王眷屬眾會道場，或處剎利，及婆羅門、長者、居士眾會道場，乃至或處天龍八部、人、非人等眾會道場。處於如是種種眾會，以圓滿音，如大雷震，隨其樂欲，成熟眾生，乃至示現入於涅槃。

## 癸二、辨能學

如是一切，我皆隨學。

## 壬二、例一切

如今世尊毗盧遮那，如是盡法界、虛空界，十方三世一切佛剎，所有塵中一切如來，皆亦是；於念念中，我皆隨學。

## 辛三、總結

如是虛空界盡，眾生界盡，眾生業盡，眾生煩惱盡，我此隨學，無有窮盡。念念相續，無有間斷；身語意業，無有疲厭。

庚九、恆順眾生（分三：辛一、牒名。辛二、釋相。辛三、總結。）

辛一、牒名

復次，善男子！言恆順眾生者。

辛二、釋相（分二：壬一、正明。壬二、徵釋。）

壬一、正明（分二：癸一、所順眾生。癸二、正明隨順。）

癸一、所順眾生

謂盡法界、虛空界，十方剎海所有眾生，種種差別。所謂卵生、胎生、濕生、化生；或有依於地、水、火、風而生住者，或有依空及諸卉木而生住者；種種生類，種種色身，種種形狀，種種相貌，種種壽量，種種族類，種種名號，種種心性，種種知見，種種欲樂，種種意行，

種種威儀，種種衣服，種種飲食，處於種種村營、聚落、城邑、宮殿；乃至一切天龍八部、人、非人等，無足、二足、四足、多足，有色、無色，有想、無想，非有想非無想。

癸二、正明隨順

如是等類，我皆於彼隨順而轉。種種承事，種種供養，如敬父母，如奉師長，及阿羅漢，乃至如來，等無有異。於諸病苦，為作良醫；於失道者，示其正路；於闇夜中，為作光明；於貧窮者，令得伏藏。菩薩如是平等饒益一切眾生。

壬二、徵釋（分二：癸一、令佛喜。癸二、增大悲。）

癸一、令佛喜（分二：子一、徵。子二、釋。）

子一、徵

何以故？

子二、釋

菩薩若能隨順眾生，則為隨順供養諸佛；若於眾生尊重承事，則為尊重承事如來；若令眾生歡喜者，則令一切如來歡喜。

癸二、增大悲（分二：子一、徵。子二、釋。）

子一、徵

何以故？

子二、釋（分三：丑一、法說。丑二、喻明。丑三、法合。）

丑一、法說

諸佛如來，以大悲心，而為體故。因於眾生，而起大悲；因於大悲，生菩提心；因菩提心，成等正覺。

丑二、喻明

譬如曠野沙磧之中，有大樹王，若根得水，枝葉華果，悉皆繁茂。



丑三、法合（分四：寅一、正合法。寅二、重徵釋。寅三、反結成。

寅四、結示知。）

寅一、正合法

生死曠野菩提樹王，亦復如是。一切眾生而為樹根，諸佛菩薩而為華果，以大悲水饒益眾生，則能成就諸佛菩薩智慧華果。

寅二、重徵釋

何以故？若諸菩薩以大悲水饒益眾生，則能成就阿耨多羅三藐三菩提故。

寅三、反結成

是故菩提屬於眾生，若無眾生，一切菩薩，終不能成無上正覺。

寅四、結示知

善男子！汝於此義，應如是解。以於眾生心平等故，則能成就圓滿大悲；以大悲心隨眾生故，則能成就供養如來。

辛三、總結

菩薩如是隨順眾生，虛空界盡，眾生界盡，眾生業盡，眾生煩惱盡，我此隨順，無有窮盡。念念相續，無有間斷；身語意業，無有疲厭。

庚十、普皆迴向（分三：辛一、牒名。辛二、釋相。辛三、總結。）

辛一、牒名

復次，善男子！言普皆迴向者。

辛二、釋相（分二：壬一、明所迴善根。壬二、正明迴向。）

壬一、明所迴善根

從初禮拜，乃至隨順，所有功德，

壬二、正明廻向（分二：癸一、離苦成善。癸二、發心代苦。）

癸一、離苦成善

皆悉廻向盡法界、虛空界一切眾生。願令眾生，常得安樂，無諸病苦。欲行惡法，皆悉不成；所修善業，皆速成就。關閉一切諸惡趣門，開示人天涅槃正路。

癸二、發心代苦

若諸眾生，因其積集諸惡業故，所感一切極重苦果，我皆代受，令彼眾生，悉得解脫，究竟成就無上菩提。

辛三、總結

菩薩如是所修廻向，虛空界盡，眾生界盡，眾生業盡，眾生煩惱盡，我此廻向，無有窮盡。念念相續，無有間斷；身語意業，無有疲厭。

戊四、結益令知

善男子！是為菩薩摩訶薩十種大願，具足圓滿。若諸菩薩，於此大願，隨順趣入，則能成熟一切眾生；則能隨順阿耨多羅三藐三菩提；則能成滿普賢菩薩諸行願海。是故善男子！汝於此義，應如是知。

丁二、顯經勝德（分二：戊一、校量聞經德。戊二、顯餘眾行德。）

戊一、校量聞經德

若有善男子、善女人，以滿十方無量無邊不可說不可說佛剎極微塵數，一切世界上妙七寶，及諸人天最勝安樂，布施爾所一切世界所有眾生，供養爾所一切世界諸佛菩薩，經爾所佛剎極微塵數劫，相續不斷，所得功德。若復有人，聞此願王，一經於耳，所有功德，比前功德，百分不及一，千分不及一，乃至優波泥沙陀分，亦不及一。

戊二、顯餘眾行德（分二：己一、總明法行略說功德。己二、徧舉一行廣顯眾德。）

己一、總明法行略說功德

或復有人以深信心，於此大願，受持讀誦，乃至書寫一四句偈，速能除滅五無間業；所有世間身心等病，種種苦惱，乃至佛剎極微塵數一切惡業，皆得消除。一切魔軍、夜叉、羅剎、若鳩槃荼、若毗舍闍、若部多等，飲血啗肉諸惡鬼神，皆悉遠離；或時發心，親近守護。

己二、徧舉一行廣顯眾德（分二：庚一、舉一行。庚二、廣顯眾德。）

庚一、舉一行

是故若人誦此願者，

庚二、廣顯眾德（分三：辛一、通明五果。辛二、別明淨土果。辛三、究竟成佛果。）

辛一、通明五果（分五：壬一增上果。壬二、等流果。壬三、異熟果。

壬四、土用果。壬五、離繫果。）

壬一增上果

行於世間，無有障礙，如空中月，出於雲翳。諸佛菩薩之所稱讚，一切人天皆應禮敬，一切

眾生悉應供養。

壬二、等流果

此善男子，善得人身，圓滿普賢所有功德，不久當如普賢菩薩，速得成就微妙色身，具三十二大丈夫相。

壬三、異熟果

若生人天，所在之處，常居勝族。

壬四、士用果

悉能破壞一切惡趣，悉能遠離一切惡友，悉能制伏一切外道。

壬五、離繫果

悉能解脫一切煩惱，如師子王摧伏群獸，堪受一切眾生供養。

辛二、別明淨土果（分二：壬一、顯法功能。壬二、別明勝果。）

## 壬一、顯法功能

又復是人，臨命終時，最後剎那，一切諸根，悉皆散壞；一切親屬，悉皆捨離；一切威勢，悉皆退失。輔相、大臣，宮城內外，象馬車乘，珍寶伏藏，如是一切，無復相隨。唯此願王，不相捨離，於一切時，引導其前，一剎那中，即得往生極樂世界。

壬二、別明勝果（分二：癸一、亦異熟果。癸二、亦土用果。）

### 癸一、亦異熟果

到已，即見阿彌陀佛，文殊師利菩薩、普賢菩薩、觀自在菩薩、彌勒菩薩等。此諸菩薩，色相端嚴，功德具足，所共圍繞。其人自見生蓮華中，蒙佛授記。

### 癸二、亦土用果

得授記已，經於無數百千萬億那由他劫，普於十方不可說不可說世界，以智慧力，隨眾生心而為利益。

辛三、究竟成佛果

不久當坐菩提道場，降伏魔軍，成等正覺，轉妙法輪。能令佛剎極微塵數世界眾生，發菩提心，隨其根性，教化成熟，乃至盡於未來劫海，廣能利益一切眾生。

丁三、結勸受持（分三：戊一、結前勝德。戊二、正明勸持。戊三、重舉勝德。）

戊一、結前勝德

善男子！彼諸眾生，若聞若信此大願王，受持讀誦，廣為人說，所有功德，除佛世尊，餘無知者。

戊二、正明勸持

是故汝等，聞此願王，莫生疑念，應當諦受，受已能讀，讀已能誦，誦已能持，乃至書寫，廣為人說。

戊三、重舉勝德



是諸人等，於一念中，所有行願皆得成就；所獲福聚，無量無邊；能於煩惱大苦海中，拔濟眾生，令其出離，皆得往生阿彌陀佛極樂世界。

丙二、偈頌（分二：丁一、標舉。丁二、正頌。）

丁一、標舉

爾時，普賢菩薩摩訶薩欲重宣此義，普觀十方，而說偈言：

丁二、正頌（分三：戊一、頌正示普因。戊二、頌顯經勝德。戊三、頌結勸受持。）

戊一、頌正示普因（分二：己一、別頌前十門。己二、頌總結十門無盡。）

己一、別頌前十門（分八：庚一、頌禮敬諸佛。庚二、頌稱讚如來。庚三、頌廣修供養。

庚四、頌懺悔業障。庚五、頌隨喜功德。庚六、頌請轉法輪。

庚七、頌請佛住世。庚八、合頌後三。）

庚一、頌禮敬諸佛

所有十方世界中，三世一切人師子，我以清淨身語意，一切遍禮盡無餘。  
普賢行願威神力，普現一切如來前；一身復現剎塵身，一一遍禮剎塵佛。

庚二、頌稱讚如來

於一塵中塵數佛，各處菩薩眾會中；無盡法界塵亦然，深信諸佛皆充滿。  
各以一切音聲海，普出無盡妙言辭，盡於未來一切劫，讚佛甚深功德海。

庚三、頌廣修供養

以諸最勝妙華鬘，伎樂塗香及傘蓋，如是最勝莊嚴具，我以供養諸如來。  
最勝衣服最勝香，末香燒香與燈燭，一一皆如妙高聚，我悉供養諸如來。  
我以廣大勝解心，深信一切三世佛，悉以普賢行願力，普遍供養諸如來。

庚四、頌懺悔業障

我昔所造諸惡業，皆由無始貪瞋癡，從身語意之所生，一切我今皆懺悔。

庚五、頌隨喜功德

十方一切諸眾生，二乘有學及無學，一切如來與菩薩，所有功德皆隨喜。

庚六、頌請轉法輪

十方所有世間燈，最初成就菩提者，我今一切皆勸請，轉於無上妙法輪。

庚七、頌請佛住世

諸佛若欲示涅槃，我悉至誠而勸請，唯願久住剎塵劫，利樂一切諸眾生。

庚八、合頌後三（分二：辛一、合頌三門。辛二、頌願生淨土。）

辛一、合頌三門（分三：壬一、總標廻向。壬二、別顯三門。壬三、結歸廻向。）

壬一、總標廻向

所有禮讚供養福，請佛住世轉法輪，隨喜懺悔諸善根，廻向眾生及佛道。

壬二、別顯三門（分三：癸一、頌常隨佛學。癸二、頌恆順眾生。

癸三、廣頌前廻向。）

癸一、頌常隨佛學

我隨一切如來學，修習普賢圓滿行；供養一切諸如來，及與現在十方佛。  
未來一切天人師，一切意樂皆圓滿，我願普隨三世學，速得成就大菩提。

癸二、頌恆順眾生

所有十方一切剎，廣大清淨妙莊嚴，眾會圍繞諸如來，悉在菩提樹王下。  
十方所有諸眾生，願離憂患常安樂，獲得甚深正法利，滅除煩惱盡無餘。

癸三、廣頌前廻向（分二：子一、別發大願。子二、總結大願。）

子一、別發大願（分十：丑一、受持願。丑二、修行二利願。

丑三、成熟眾生願。丑四、不離願。丑五、供養願。

丑六、利益願。丑七、轉法輪願。丑八、淨土願。

丑九、承事願。丑十、成正覺願。）

丑一、受持願

我為菩提修行時，一切趣中成宿命；常得出家修淨戒，無垢無破無穿漏。  
天龍夜叉鳩槃荼，乃至人與非人等，所有一切眾生語，悉以諸音而說法。

丑二、修行二利願

勤修清淨波羅蜜，恆不忘失菩提心；滅除障垢無有餘，一切妙行皆成就。  
於諸惑業及魔境，世間道中得解脫；猶如蓮華不著水，亦如日月不住空。

丑三、成熟眾生願

悉除一切惡道苦，等與一切群生樂；如是經於剎塵劫，十方利益恆無盡。  
我常隨順諸眾生，盡於未來一切劫，恆修普賢廣大行，圓滿無上大菩提。

丑四、不離願

所有與我同行者，於一切處同集會，身口意業皆同等，一切行願同修學。  
所有益我善知識，為我顯示普賢行；常願與我同集會，於我常生歡喜心。

丑五、供養願

願常面見諸如來，及諸佛子眾圍繞；於彼皆興廣大供，盡未來劫無疲厭。  
願持諸佛微妙法，光顯一切菩提行，究竟清淨普賢道，盡未來劫常修習。

丑六、利益願

我於一切諸有中，所修福智恆無盡，定慧方便及解脫，獲諸無盡功德藏。  
一塵中有塵數剎，一一剎有難思佛，一一佛處眾會中，我見恆演菩提行。

丑七、轉法輪願

普盡十方諸剎海，一一毛端三世海，佛海及與國土海，我遍修行經劫海。  
一切如來語清淨，一言具眾音聲海；隨諸眾生意樂音，一一流佛辯才海。

三世一切諸如來，於彼無盡語言海，恆轉理趣妙法輪，我深智力普能入。

丑八、淨土願

我能深入於未來，盡一切劫為一念，三世所有一切劫，為一念際我皆入。  
我於一念見三世，所有一切人師子，亦常入佛境界中，如幻解脫及威力。

丑九、承事願

於一毛端極微中，出現三世莊嚴刹，十方塵刹諸毛端，我皆深入而嚴淨。  
所有未來照世燈，成道轉法悟群有，究竟佛事示涅槃，我皆往詣而親近。

丑十、成正覺願

速疾周遍神通力，普門遍入大乘力，智行普修功德力，威神普覆大慈力。  
遍淨莊嚴勝福力，無著無依智慧力，定慧方便威神力，普能積集菩提力，  
清淨一切善業力，摧滅一切煩惱力，降伏一切諸魔力，圓滿普賢諸行力。

子二、總結大願（分二：丑一、總結十願。丑二、結歸二聖。）

丑一、總結十願

普能嚴淨諸剎海，解脫一切眾生海，善能分別諸法海，能甚深入智慧海。  
普能清淨諸行海，圓滿一切諸願海，親近供養諸佛海，修行無倦經劫海。  
三世一切諸如來，最勝菩提諸行願，我皆供養圓滿修，以普賢行悟菩提。

丑二、結歸二聖（分二：寅一、偏同普賢。寅二、雙同二聖。）

寅一、偏同普賢

一切如來有長子，彼名號曰普賢尊，我今迴向諸善根，願諸智行悉同彼。  
願身口意恆清淨，諸行剎土亦復然；如是智慧號普賢，願我與彼皆同等。

寅二、雙同二聖

我為遍淨普賢行，文殊師利諸大願，滿彼事業盡無餘，未來際劫恆無倦。



我所修行無有量，獲得無量諸功德，安住無量諸行中，了達一切神通力。  
文殊師利勇猛智，普賢慧行亦復然，我今迴向諸善根，隨彼一切常修學。

壬三、結歸迴向

三世諸佛所稱歎，如是最勝諸大願，我今迴向諸善根，為得普賢殊勝行。

辛二、頌願生淨土

願我臨欲命終時，盡除一切諸障礙，面見彼佛阿彌陀，即得往生安樂剎。  
我既往生彼國已，現前成就此大願，一切圓滿盡無餘，利樂一切眾生界。  
彼佛眾會咸清淨，我時於勝蓮華生，親覩如來無量光，現前授我菩提記。  
蒙彼如來授記已，化身無數百俱胝，智力廣大遍十方，普利一切眾生界。

己二、頌總結十門無盡

乃至虛空世界盡，眾生及業煩惱盡，如是一切無盡時，我願究竟恆無盡。

戊二、頌顯經勝德（分二：己二、頌校量聞經益。己二、通頌顯眾行益。）

己二、頌校量聞經益

十方所有無邊剎，莊嚴眾寶供如來，最勝安樂施天人，經一切剎微塵劫。  
若人於此勝願王，一經於耳能生信，求勝菩提心渴仰，獲勝功德過於彼。

己二、通頌顯眾行益（分二：庚一、通頌五果。庚二、頌究竟果。）

庚一、通頌五果（分五：辛一、增上果。辛二、等流果。辛三、離繫果。

辛四、異熟果。辛五、士用果。）

辛一、增上果

即常遠離惡知識，永離一切諸惡道，速見如來無量光，具此普賢最勝願。

辛二、等流果

此人善得勝壽命，此人善來人中生，此人不久當成就，如彼普賢菩薩行。

辛三、離繫果

往昔由無智慧力，所造極惡五無間，誦此普賢大願王，一念速疾皆消滅。

辛四、異熟果

族姓種類及容色，相好智慧咸圓滿；

辛五、士用果

諸魔外道不能摧，堪為三界所應供。

庚二、頌究竟果

速詣菩提大樹王，坐已降伏諸魔眾，成等正覺轉法輪，普利一切諸含識。

戊三、頌結勸受持（分三：己一、結前諸行。己二、重顯勝益。己三、結成迴向。）

己一、結前諸行

若人於此普賢願，讀誦受持及演說。

## 己二、重顯勝益

果報唯佛能證知，決定獲勝菩提道。

若人誦此普賢願，我說少分之善根，一念一切悉皆圓，成就眾生清淨願。

## 己三、結成廻向

我此普賢殊勝行，無邊勝福皆廻向，普願沈溺諸眾生，速往無量光佛剎。

## 乙二、結說讚善

爾時，普賢菩薩摩訶薩，於如來前，說此普賢廣大願王清淨偈已。善財童子踴躍無量，一切菩薩皆大歡喜。如來讚言：「善哉！善哉！」

甲三、流通分（分二：乙一、指所說法。乙二、時眾受持。）

## 乙一、指所說法

爾時，世尊與諸聖者菩薩摩訶薩，演說如是不可思議解脫境界勝法門時。

乙二、時眾受持（分二：丙一、列能持眾。丙二、總顯受持。）

丙一、列能持眾（分三：丁一、菩薩眾。丁二、聲聞眾。丁三、雜類眾。）

丁一、菩薩眾（分四：戊一、第一類。戊二、第二類。戊三、第三類。戊四、第四類。）

戊一、第一類

文殊師利菩薩而為上首，諸大菩薩，及所成熟六千比丘；

戊二、第二類

彌勒菩薩而為上首，賢劫一切諸大菩薩；

戊三、第三類

無垢普賢菩薩而為上首，一生補處，住灌頂位諸大菩薩；

戊四、第四類

及餘十方種種世界普來集會，一切剎海極微塵數菩薩摩訶薩眾；

丁二、聲聞眾

大智舍利弗，摩訶目犍連等，而為上首，諸大聲聞；

丁三、雜類眾

并（並）諸人天一切世主，天、龍、夜叉、乾闥婆、阿修羅、迦樓羅、緊那羅、摩睺羅伽，人、非人等，一切大眾；

丙二、總顯受持

聞佛所說，皆大歡喜，信受奉行。

肆、結示勸修

◆《靈峰宗論》卷第九之一。《普賢行願品》頌云：

十大願王，導歸極樂；末後牢關，和盤直拓。

擬議躊躇，千錯萬錯；說性譚心，無繩自縛。

親覩如來無量光，方知此語非嬉謔。

寄語參玄學語流，休將向上閒穿鑿。